

জাতীয়

তারেক রহমানের সঙ্গে বৈঠকের পর নতুন সম্ভাবনার কথা বললেন সার্জিও গোর

যুক্তরাষ্ট্র ও বাংলাদেশের মধ্যে অর্থনৈতিক সহযোগিতা বৃদ্ধি এবং আমাদের অংশীদারত্বকে আরও দৃঢ় করার বিদ্যমান চমৎকার সুযোগ নিয়ে আলোচনা করেছি

প্রতিবেদক: ঢাকা প্রোব ডেস্ক

প্রকাশের তারিখ: শনিবার, ০১ আগস্ট ২০২৬, ০৫:১০ PM



ছবি সংগৃহীত

প্রধানমন্ত্রী তারেক রহমানের সঙ্গে সৌজন্য সাক্ষাতের পর বাংলাদেশ ও যুক্তরাষ্ট্রের মধ্যকার অর্থনৈতিক সহযোগিতা ও দ্বিপাক্ষিক অংশীদারত্ব আরও জোরদারের আশাবাদ ব্যক্ত করেছেন মার্কিন যুক্তরাষ্ট্রের দক্ষিণ ও মধ্য এশিয়াবিশয়ক বিশেষ দূত রাষ্ট্রদূত সার্জিও গোর।

শনিবার (১ আগস্ট) সকালে প্রধানমন্ত্রীর তেজগাঁও কার্যালয়ে অনুষ্ঠিত বৈঠক শেষে সামাজিক যোগাযোগমাধ্যম এক্স-এ দেওয়া এক বার্তায় তিনি বলেন, যুক্তরাষ্ট্র ও বাংলাদেশের মধ্যে অর্থনৈতিক সহযোগিতা সম্প্রসারণ এবং বিদ্যমান অংশীদারত্ব আরও শক্তিশালী করার সম্ভাবনা নিয়ে প্রধানমন্ত্রীর সঙ্গে ফলপ্রসূ আলোচনা হয়েছে।

সার্জিও গোর বলেন, 'আজ আমি মাননীয় প্রধানমন্ত্রী তারেক রহমানের সঙ্গে সাক্ষাতে যুক্তরাষ্ট্র ও বাংলাদেশের মধ্যে অর্থনৈতিক সহযোগিতা

বৃদ্ধি এবং আমাদের অংশীদারত্বকে আরও দৃঢ় করার বিদ্যমান চমৎকার সুযোগ নিয়ে আলোচনা করেছি। এটি যুক্তরাষ্ট্রের একটি অগ্রাধিকার এবং আমরা একসঙ্গে কাজ করলে বাস্তব সাফল্য অর্জন করতে পারব।

পরে ঢাকাস্থ মার্কিন দূতাবাস তাদের আনুষ্ঠানিক ফেসবুক পেজেও সার্জিও গোরের এ বক্তব্য প্রকাশ করে।

এর আগে গত ৩০ জুলাই বাংলাদেশ সফরে ঢাকায় পৌঁছান মার্কিন বিশেষ দূত। সফরের প্রথম দিন তিনি পররাষ্ট্রমন্ত্রী ড. খলিলুর রহমানের সঙ্গে বৈঠক করেন। বৈঠক শেষে এক্সে দেওয়া এক পোস্টে তিনি বাংলাদেশ-যুক্তরাষ্ট্র সম্পর্ক আরও জোরদারে ইতিবাচক অগ্রগতির কথা উল্লেখ করেন।

সফরের অংশ হিসেবে তিনি কক্সবাজারের রোহিঙ্গা শরণার্থী শিবিরও পরিদর্শন করেন। পরিদর্শন শেষে আন্তর্জাতিক সম্প্রদায়ের প্রতি রোহিঙ্গাদের জন্য মানবিক সহায়তা বাড়ানোর আহ্বান জানান তিনি।

এদিকে বাংলাদেশ সম্পর্কে যুক্তরাষ্ট্রের ভ্রমণ সতর্কতা শিথিলের বিষয়েও ইতিবাচক বার্তা দেন সার্জিও গোর। এক্সে দেওয়া আরেক পোস্টে তিনি জানান, মাঠপর্যায়ের নিরাপত্তা পরিস্থিতির উন্নতি বিবেচনায় নিয়ে মার্কিন স্টেট ডিপার্টমেন্ট বাংলাদেশের জন্য ভ্রমণ সতর্কতার মাত্রা লেভেল-৩ থেকে কমিয়ে লেভেল-২ করেছে। তবে কয়েকটি নির্দিষ্ট এলাকায় অতিরিক্ত সতর্কতা বহাল রয়েছে এবং সেসব এলাকা এড়িয়ে চলার পরামর্শ দেওয়া হয়েছে।

বাংলাদেশ সফরকালে সার্জিও গোরের ধারাবাহিক বক্তব্যে দুই দেশের অর্থনৈতিক সম্পর্ক, বিনিয়োগ সহযোগিতা এবং কৌশলগত অংশীদারত্ব আরও গভীর করার বিষয়ে ওয়াশিংটনের আগ্রহের প্রতিফলন ঘটেছে।

এ বিভাগের আরও খবর



গ্যাস-বিদ্যুতের ভোগান্তি আরো দুই বছর পোহাতে হবে
অর্থমন্ত্রী আমির খসরু মাহমুদ চৌধুরী বলেন, গ্যাস-বিদ্যুতের সমস্যা রাতারাতি সমাধান করা সম্ভব নয়। নতুন কোনো ব্যবস্থা নিতে গেলে অন্তত দুই বছর সম...



প্রধানমন্ত্রীর ভারত সফরের আগে অনুকূল পরিবেশ তৈরির আহ্বান ঢাকার
প্রধানমন্ত্রী তারেক রহমানের সম্ভাব্য ভারত সফরের আগে অনুকূল পরিবেশ তৈরির জন্য নয়াদিল্লির প্রতি আহ্বান জানিয়েছে
ঢাকা। ১৬ আগস্ট) প...



বিদ্যুৎ-জ্বালানি সংকটের জন্য স্বৈরাচারী সরকার দায়ী: প্রধানমন্ত্রী
পতিত স্বৈরাচারী আওয়ামী লীগ সরকারের অব্যবস্থাপনা ও অপরিচালিত পদক্ষেপের কারণেই দেশে বিদ্যুৎ ও জ্বালানি সংকট তৈরি
হয়েছে বলে মন্তব্য করেছেন প্র...



রাজধানীতে ২৪ ঘণ্টায় ৫১১ জন গ্রেপ্তার
রাজধানীতে ঢাকা মেট্রোপলিটন পুলিশের (ডিএমপি) নিয়মিত অভিযানে গত ২৪ ঘণ্টায় ৫১১ জনকে গ্রেপ্তার করা হয়েছে। এ সময়
বিভিন্ন থানায় ৪৯টি মামলা দায়ের ক...

Copyright Dhaka Probe

অনলাইন সংস্করণ পড়তে ভিজিট করুন: <https://dhakaprobe.com/national/tarek-rhmaner-sngge-boithker-pr-ntun-smbhabnar-ktha-bllen-sarjio-gor>